

selbst verboten/die Perlein nicht für die Schwein/vnnd das Heiligthumb nicht für die Hund zu werffen/(welche Schwein vnd Hund ich gar zu wol kenne/) so weiß ich doch wol/das men nichts beschehret ist/wann mans ihnen gleich gar für die Nasen mahlete.

In solchem meinem zweiffel hat doch bey mir vberwunden/die eygentliche betrachtung/das ich nicht den alten Philosophis, so zum theil heydisch vnd vngünstig gewesen vnd wenigen mit solchem Dono aureo gedienet/gelobt vnd geschworen/ sondern dem höchsten Spagyro vnd Medico Cœlesti CHRISTO IESU meinem Gerechtigten Heyland vnd Erlöser / dem ich billich folgen vnd gehorchen soll vnd muß/vnnd gilt derowegen mehr bey mir sein Mandatum Magnum & Novum, vnd seine güldene Regula: Diliges proximum tuum sicut teipsum. Item/Liet ewere Feind/thut denen guts die euch belendigen/ &c. Was ich dir derowegen hierinn für Arcana communicir/ geschicht solches auß rechter Christlicher Brüderlicher Lieb vñ angeborner Erew gegen dir/seyest gleich wer du wöllest / Jud/ Türck/ Heyd oder Christ/dann ich jederman zu dienen geneigt bin von Herzen/vnd so dir Gott auß diesen meinen Revelationibus was beschehren wird / so wollest du dich danckbar gegen ihm erzeigen mit ein Gottsäligen Wandel/ihm dafür loben vnd dancken / solches zu keiner Hoffart/ Pracht/ Uebermuht oder Weltlicher üppigkeit anwenden/Meiner im besten darben gedenccken / vnd den Armen dafür guts thun/ dir dieselben ja lassen trewlich befohlen sein/ Thust du das / so wirst du zeitlich vnd ewig reich vnd selig werden/durch CHRISTVM IESVM, welchs ich dir von Herzen wünschen thue / vnd diß hab ich dich hierben fürklich erinnern wollen / wolte auch gern in vollkommene Admonition hierben angehenckt haben / wie du dich allerdings verhalten soltest / das Aureum Donum Philosophorum zu erlangen / hat aber dißmal nicht geschehen können / aber in einem folgenden Libell. Hiemit dem Allmächtigen Gott befohlen.

— 696 —

F I N I S.